



**Sumáriu Kazu
Tribunál Distritál Oekusi
Fevereiro 2021**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 31

Tipu kazu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	13
Artigu 177,176 KP	Abuzu seksuál ba menór no pornografia infantil	1
Artigu 177 KP	Abuzu seksuál ba menór	1
Artigu 145, 23, 24, 138 KP	Ofensa ba integridadae fízika simples, tentativa, tentativa nia punibilidade omisídiu simples	1
Artigu 154 KP	Maus-tratus ba kónjuje	2
Artigu 316 KP	Kontrabandu	6
Artigu 252 KP	Furtu agravadu	1
Artigu 207 KP	Kondusaun sein karta	1
Artigu 148 KP	Ofensa ba integridade fízika negligente	1
Artigu 151 KP	Ofensa korporál resíproka	1
Artigu 145 KP	Ofensa ba integridade fízika simples	1
Artigu 828 (2) KPS & artigu 1652, 1653, 1654, 1655 KS	Divórsiu ho mutu konsentimentu (Divórcio por mútuo consentimento)	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Artigu 828 (3) KPS & artigu 1652, 1653, 1654, 1655 KS	Divórsiu ho mutu konsentimentu (Divórcio por mútuo consentimento)	1
Totál		31

2. Totál desizaun ne'ebé JSMP monitoriza : 14

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	5
Pena multa	Artigu 67 KP	3
Admoestasaun	Artigu 82 KP	1
Omologa	Artigu 216 KPP	5
Totál		14

3. Totál kazu sira ne'ebé adia tuir JSMP nia monitorizasaun : 0

4. Total kazu sira ne'ebé kontinua prosesu tuir JSMP nia monitorizasaun : 17

B. Deskrisaun sumáriu julgamentu ba desizaun kazu sira

1. Kazu sivíl divórsiu

Nú. Prosesu : 0017/20.CVTDO
 Kompozisaun Tribunál : Singulár
 Juis : Dr. Hugo da Cruz Pui
 Prokuradór : Dr. Pedro Baptista Aleixo dos Santos
 Defeza : Dr. Marcelino Marques Coro
 Desizaun : Dekreta provizoriamente separasaun ho mutu konsentimentu entre rekerente sira

Iha 03 Feveireiru 2021, Tribunál Distritál Oekusi prezide leitura sentensa hodi dekreta provizoriamente divórsiu por mutuo consentimento/separasaun ho mutu konsentimentu (*perceraian dengan persetujuan bersama*) ba rekerente sira mak hanesan Sr. JL (la'en) no Sra. MC (feen), iha Sub-distritu Pante-makasar, Distritu Oekusi.

Desizaun

Tribunál bazeia ba artigu 828 nú. 2 Kódigu Prosesu Sivíl (KPS) hala'o konferénsia ba rekerente sira mak hanesan Sr. JL nu'udar la'en no Sra. MC nu'udar feen. Hahú husi konferénsia primeiru, konferénsia segundu to'o sentensa rekerente sira konfirma ho boa-vontade katak sira na'in rua hakarak atu husik malu/fahe malu nu'udar feen ho la'en.

Kona-ba podér paternál ba labarik sira (oan husi rekerente sira) tribunál fahe tuir konkordánsia husi parte rua mak hanesan; LCL) (tinan 17), ECL (tinan 15) no JCL (tinan 13) sei hela hamutuk ho nia aman ka rekerente Sr. JL. Entretantu labarik sira mak hanesan; MCL (tinan 6) no RCL (tinan 4) sei hela hamutuk ho sira nia inan ka rekerida Sra. MC. Mezmu hela fahe malu hanesan ne'e, maibé tribunál fó livre nafatin ba labarik sira bá mai entre rekerente sira hanesan inan ka aman.

Durante sira moris hamutuk nu'udar feen ho la'en, rekerente sira iha bens komún mak hanesan uma fatuk ida ho medida 12 vezes 12 no motorizada ida. Relaciona ho bens komún ne'e, tribunál deside motorizada sei entrega ba rekerida Sra. MC no uma sei entrega ba rekeridu Sr. JL. Alende ne'e mós, rekeridu Sr. JL sei fó tan kompensasaun ho valor osan US\$2.000.00 ba rekerida Sra. MC tanba rekerida mak sai husi uma ne'ebé sira halo hamutuk ho razaun tanba rai refere eransa husi rekeridu nia inan-aman.

Bazeia ba artigu 828 nú. 2 KPS kona-ba konferénsia, artigu 1652 KS kona-ba rekezitu sira, artigu 1653 KS kona-ba primeira konférensia, artigu 1654 KS kona-ba segundu konférensia no artigu 1655 KS kona-ba sentensa, nune'e tribunál konklui prosesu ne'e no omologa akordu refere no dekreta provizoriamente separasaun ho mutu konsentimentu entre rekerente no rekerida (*Perceraian untuk sementara diputuskan dengan persetujuan bersama antara pasangan*) ba prosesu refere.

2. Krime ofensa korporál resíproka

Nú. Prosesu : 0122/20.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista A. d. Santos
Defeza : Dr. Calisto Tout
Desizaun : Omologa pedidu dezisténsia keixa

Iha 04 Feveireiru 2021, Tribunál Distritál Oekusi prezide julgamentu tentativa konsiliaun ba krime ofensa korporál resíproka ne'ebé envolve HMT nu'udar la'en no AJ nu'udar feen, iha Distritu Oekusi.

Akuzasaun Prokuradór

Prokuradór akuza katak iha 24 Agostu 2020, iha oras tuku 22:00 kalan, HMT basa dala rua iha AJ nia hasan parte karuk no basa dala rua iha AJ nia hasan parte loos to'o AJ monu ba rai. Aktu sira ne'e rezulta mean, bubu no moras. Tanba ne'e, AJ la simu no lori karteira ne'ebé iha karteira laran iha botir mina gandapura no baku dala ida iha HMT nia matan-fukun parte loos rezulta kanek, ran, bubu no moras. Kazu ne'e aneksa hamutuk AJ no HMT nia relatóriu médiku husi Ospital Referál Oekusi no fotografia husi polisia.

Prokuradór akuza arguidu HTM no arguida AJ kontra artigu 151 KP kona-ba ofensa korporál resíproka ho moldura penál to'o tinan 2 ka multa.

Produsaun ba prova sira

Bazeia ba artigu 262 Kódigu Prosesu Penál (KPP) kona-ba tentativa ba konsiliaun ba kazu krime sira ho natureza semi-públiku, antes tama ba prosesu produsaun ba prova sira, juis husu ba parte sira atu halo tentativa konsiliaun.

Iha prosesu tentativa konsiliaun ne'e, HTM no AJ rekoñese katak sira baku malu maibé sira dame malu ona nune'e sira hakarak deziste tiha sira nia keixa. Ho nune'e, sira husu ba tribunál atu deziste tiha keixa kontra malu ne'e.

Alegasaun finál

Prokuradór no defeza konkorda ho parte rua nia akordu ne'e no husu ba tribunál atu omologa prosesu ne'e.

Desizaun

Bazeia ba akordu husi parte sira no pedidu dezisténsia husi lezada ho lezadu, tribunál omologa prosesu ne'e.

3. Krime ofensa ba integridade fízika simples

Nú. Prosesu : 0010/20.OEOSL
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Omologa pedidu dezisténsia keixa

Iha 05 Fevereiru 2021, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Jose Lafu hasoru lezadu Aleixo Ulan nu'udar arguidu nia primu, iha Suku Usitaqueno, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 24 Jullu 2020, iha oras tuku 22:00 kalan, arguidu tuku dala ida iha lezadu nia reen-toos, tuku dala ida iha lezadu nia hasan parte karuk no tebe dala ida iha hirus-matan. Aktu sira ne'e rezulta lezadu sofre moras no bubu. Antes agresaun ne'e, arguidu no lezadu hemu tua sabu hamutuk to'o lanu. Ho nune'e, mosu agresaun hirak ne'e. Kazu ne'e aneksa ho relatóriu médiku husi Sentru Saude Oesilo no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu ho lezadu.

Iha prosesu tentativa konsiliaun ne'e, lezadu hakarak dame ho arguidu sein kondisaun ruma. Alende ne'e, arguidu mós konkorda ho pedidu lezadu nian no deklarata katak arrepende ona ninia hahalok no promete sei la repete tan hahalok hanesan iha futuro, nune'e lezadu husu ba tribunál atu deziste tiha ninia-keixa hasoru arguidu.

Alegasaun finál

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, tribunál konklui prosesu ne'e no omologa akordu dame ba prosesu refere.

4. Krime ofensa ba integridade fízika simples ho natureza violénsia doméstika

Nú. Prosesu : 0087/20.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 1 suspende ba tinan 1

Iha 08 Feveireiru 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FO hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 25 Maiu 2020, maizumenus iha oras tuku 19:50 kalan, arguidu basa dala ida iha lezada niaibun parte leten no tuku dala ida iha lezada nia kanuruk. Aktu sira ne'e rezulta kanek no ran ihaibun no moras iha kanuruk. Antes agresaun ne'e, arguidu ho lezada diskute malu kona-ba lezada husu save motor ba arguidu atu ba merkadu hodi sosa modo, maibé arguidu la fó. Ho nune'e sira diskute malu no arguidu komete agresaun hirak ne'e hasoru lezada. Kazu ne'e aneksa hamutuk ho relatóriu médiku husi Pradet no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu mós deklara katak di'ak malu ona ho lezada no promete sei la repete hahalok hanesan hasoru lezada ka ema seluk iha futuro. Arguidu hatutan katak foin primeiravés halo krime no mai hatan iha tribunál, serbisu hanesan motorista ho rendimentu kada fulan US\$155.00 no iha oan na'in tolu.

Alende ne'e, lezada mós kontinua konfirma faktu sira hotu iha akuzasaun no deklara katak di'ak malu ona ho arguidu no depoisde akontesimentu ne'e arguidu la komete ona krime hasoru lezada. Lezada mós hatutan katak sira hola malu iha tinan 2004 no arguidu foin primeiravés komete krime hasoru lezada.

Tanba arguidu konfesa no konfirma mós husi lezada, nune'e prokuradór husu ba tribunál atu presinde testemuña ninia depoimentu.

Alegasaun finál

Prokuradór haktuir katak arguidu hatene hela kuandu halo aktu violénsia ne'e bele rezulta ema seluk nia isin hetan bubu, kanek no moras, maibé arguidu hakarak halo nafatin. Prokuradór reforsa liután katak arguidu halo krime ne'e ho livre hasoru lezada ne'ebé tuir loloos arguidu mak tenke proteze lezada husi kualkér violénsia, maibé pelu kontráriu arguidu mak halo fali aktu violénsia hasoru lezada. Tanba ne'e, atu evita arguidu repete ninia hahalok ne'e ba lezada ka ema seluk, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak aktu violénsia ne'e akontese kuandu mosu diskusaun entre arguidu no lezada. Maibé iha produsaun ba prova arguidu konfesa faktu hotu iha akuzasaun sein rezerva, arrepende ninia hahalok, promete sei la komete tan krime hasoru nia membru família ka ema seluk. Alende ne'e, arguidu dame ona ho lezada, iha oan na'in tolu no arguidu nu'udar motorista ho rendimentu kada fulan US\$155.00. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu ne'ebé prodús durante julgamentu tribunál prova katak arguidu basa dala ida iha lezada niaibun parte leten no tuku dala ida iha lezada nia kanuruk. Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no promete sei la repete hahalok hanesan hasoru lezada no ema seluk, nune'e tribunál konklui prosesu no kondena arguidu ho pena prizaun tinan ida suspende ba tinan ida.

5. Krime ofensa ba integridade fízika simples ho natureza violénsia doméstika

Nú. Prosesu : 0127/19.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Filipe Landos (advogadu privadu)
Desizaun : Pena prizaun tinan 1 suspende ba tinan 1 fulan 6

Iha 08 Fevereiru 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SO hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 27 Agostu 2019, maizumenus iha oras tuku 23:00 kalan, arguidu fila ba uma ho kondisaun lanu, diskute malu ho lezada, tanba deskonfia lezada *amante* (selingkuh) ho mane seluk. Ho nune'e, arguidu foti bikan masa ho etu iha laran no tuda dala ida ba iha lezada nia kelen parte loos no basa dala rua iha lezada nia hasan parte karuk. Aktu sira ne'e rezulta moras iha hasan parte karuk no kelen loos. Kazu ne'e aneksa hamutuk ho relatóriu médiku husi Pradet no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente ba faktu sira iha akuzasaun katak lori duni bikan tuda lezada no basa dala ida, la'os dala rua. Arguidu mós deklara katak arrepende ninia hahalok, di'ak malu ona ho lezada no promete sei la repete hahalok hanesan hasoru lezada ka ema seluk iha futuru. Arguidu haktuir katak foin primeiravés halo krime no mai hatan iha tribunál, laiha rendimentu fiksi kada fulan no iha oan na'in lima.

Entretantu lezada kontinua konfirma faktu sira iha akuzasaun no deklara mós katak depoisde akontesimentu ne'e liu tiha lora ida arguidu husu deskulpa ba lezada no sira di'ak malu ona to'o agora.

Testemuña EMO nu'udar arguidu no lezada sira nia oan fetu ho idade tinan 15, hili direitu nonook ka lakohi atu fó depoimentu.

Alegasaun finál

Prokuradór konsidera arguidu provadu komete krime hasoru lezada bazeia ba deklarasaun arguidu nian no konfirmasaun husi lezada ba faktu sira inklui relatóriu médiku no fotografia husi polísia. Tanba ne'e, husu ba tribunál atu kondena arguidu ho pena ne'ebé hakerek ona iha artigu 145 KP atu nune'e arguidu la repete nia hahalok ne'e iha futuru no eduka ema seluk atu labele halo tuir.

Entretantu defeza haktuir katak aktu violénsia ne'e akontese duni hasoru lezada. Maibé tanba arguidu kolabora di'ak ho tribunál, arrepende ninia hahalok, promete sei la komete tan krime hanesan iha futuru, dame malu ona to'o agora, iha oan na'in lima no laiha rendimentu fiksi kada fulan, nune'e husu ba tribunál atu fó pena ne'ebé adekuadu ba arguidu.

Desizaun

Depoisde avalia faktu hotu ne'ebé prodús durante julgamentu, tribunál prova katak arguidu lori bikan masa ne'ebé etu iha laran hela no tuda dala ida iha lezada nia kelen parte loos no basa dala rua iha lezada nia hasan parte karuk. Tanba ne'e, tribunál fó kredibilidade liu ba lezada nia deklarasaun tanba alende konfirma faktu sira, prova sira mós mai husi relatóriu médiku no fotografia husi polísia.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu arrepende ninia hahalok, di'ak malu ona ho lezada no promete sei la repete hahalok hanesan hasoru lezada ka ema seluk iha futuru, foin primeiravés halo krime no mai hatan iha tribunál, laiha rendimentu fiksi kada fulan no iha oan na'in lima, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

6. Kazu sivíl divórsiu

Nú. Prosesu : 0007/20.CVTDO
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Dekreta provizoriamente separasaun ho mutu konsentimentu ba rekerente sira

Iha 09 Feveireiru 2021, Tribunál Distritál Oekusi prezide leitura sentensa hodi dekreta provizoriamente divórsiu por mutuo consentimento/separasaun ho mutu konsentimentu (*perceraiian dengan persetujuan bersama*) ba rekerente sira hanesan Sr. AB (la'en) no Sra. CT (feen), iha Sub-distritu Pante-makasar, Distritu Oekusi.

Desizaun

Tribunál bazeia ba artigu 828 nú. 2 KPS, hala'o konferénsia ba rekerente sira mak hanesan Sr. AB nu'udar la'en no Sra. CT nu'udar feen. Hahú husi konferénsia primeiru, konferénsia segundu to'o iha sentensa, rekerente sira konfirma ho boa-vontade katak sira na'in rua hakarak atu husik malu ka fahe malu nu'udar feen ho la'en tanba entre sira na'in rua laiha ona boa-vontade atu moris hamutuk hanesan família ida.

Relasiona ho podér paternál ba labarik sira, tribunál deside bazeia ba konkordánsia husi parte rua, hanesan EBB (tinan 16), GSB (tinan 14), ZTB (tinan 9) no AJB (tinan 5) sei hela hamutuk ho sira nia inan ka rekerida CT iha sira nia uma rasik no rekerente AB mak sai husi uma maibé nafatin iha responsabilidade ba alimentasaun ba oan sira kada fulan US\$75.00. Alende ne'e, tribunál fó livre nafatin ba labarik sira bele ba mai ba rekerente sira hanesan inan no aman.

Iha konferénsia definitiva ne'e, tribunál bazeia ba artigu 828 nú. 2 KPS kona-ba konferénsia no artigu 1652 KS kona-ba rekeztu sira, artigu 1653 KS kona-ba primeira konferénsia, artigu 1654 KS kona-ba segundu konférensia no artigu 1655 KS kona-ba sentensa, nune'e tribunál konklui prosesu ne'e no omologa akordu refere no dekreta divórsiu por mútuo consentimento/separasaun ho mutu konsentimentu entre rekerente no rekerida (*Perceraiian diputuskan dengan persetujuan bersama antara pasangan*) ba prosesu refere.

7. Krime ofensa ba integridade fízika simples ho natureza violénsia doméstika

Nú. Prosesu : 0090/20.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 3 suspende ba tinan 4

Iha 09 Fevvereiru 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RE hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 27 Maiu 2020, maizumenus iha oras tuku 17:00 lokraik, arguidu tebe dala rua iha lezada nia kidun, tuku dala rua iha lezada nia kotuk laran no mós lori martelu parte ai (uza hodi kaer) baku dala ida iha lezada nia kotuk laran. Arguidu nia asaun sira ne'e rezulta lezada sofre moras. Antes agresaun ne'e, arguidu ho lezada diskute malu kona-ba lezada haruka arguidu telefone ba responsavel EDTL atu hadia sira nia eletrisidade ne'ebé mate hela, maibé arguidu lakohi. Ho nune'e, arguidu komete agresaun hirak ne'e. Kazu ne'e aneksa mós ho relatóriu médiku husi Pradet no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no arguidu rekoñese katak hahalok hanesan ne'e ladi'ak. Arguidu mós deklara katak arrepende ninia hahalok maibé seidak di'ak malu ho lezada tanba fulan 8 (ualu) ona sira na'in rua moris separadu. Arguidu hanesan estudante iha UNTL, laiha rendimentu fiksi kada fulan, foin primeiravés halo krime no mai hatan iha tribunál. Arguidu haktuir tan katak lakohi ona atu moris hamutuk ho lezada hanesan feen ho la'en.

Alende ne'e, lezada ho matan-been kontinua konfirma faktu sira iha akuzasaun no deklara katak sira na'in rua hola malu iha tinan 2017, lezada grávida no partu liuhusi operasaun no doutór sira hasai tiha labarik nia oan fatin atu lezada labele grávida tan tanba sei fó impaktu la di'ak ba lezada nia saude. Depoisde operasaun ne'e liútiha fulan tolu mak sira nia oan mate. Husi ne'e kedas, arguidu sempre halo agresaun fízika hasoru lezada. Ho nune'e lezada mós deside lakohi ona atu moris hamutuk ho arguidu.

Alegasaun finál

Prokuradór konsidera arguidu nia hahalok ne'e kruel teb-tebes tanba realidade iha produsaun ba prova lezada rasik hato'o nia deklarasaun ho sentimentu tanis no deside lakohi ona atu moris hamutuk ho arguidu, tanba tuir lezada nia deklarasaun katak depoisde moris hamutuk arguidu sempre halo agresaun fízika hasoru lezada. Tanba ne'e, husu ba tribunál atu aplika pena ne'ebé hakerek ona iha artigu 145 KP atu iha futuro arguidu labele repete ninia hahalok ne'e hasoru ema seluk.

Entretantu defeza haktuir katak arguidu konfesa, arrepende ninia hahalok, mezmus arguidu ho lezada hakarak atu husik malu perante tribunál nia oin, maibé nafatin husu ba tribunál atu konsidera sirkunstánsia atenuante sira hanesan arguidu foin primeiravés mai hatan iha tribunál, nu'udar estudante sei sustenta husi inan-aman, nune'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu hotu ne'ebé prodús durante julgamentu, tribunál prova katak arguidu tebe dala rua iha lezada nia kidun, tuku dala rua iha lezada nia kotuk laran no kontinua lori martelu parte ai (uza hodi kaer) baku dala ida iha lezada nia kotuk laran. Tribunál mós konsidera katak arguidu nia hahalok hirak ne'e kruel teb-tebes hasoru lezada no pior liútan kuandu arguidu hatene hela katak antes ne'e lezada opera.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan haat.

8. Krime ofensa ba integridade fízika negligente

Nú. Prosesu : 0021/19.OEOSL
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Omologa pedidu dezisténsia keixa

Iha 09 Fevereiro 2021, Tribunál Distritál Oekusi prezide julgamentu tentativa konsiliaun ba krime ofensa ba integridade fízika negligente ne'ebé envolve arguidu AB hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 03 Outubru 2019, iha oras tuku 08:00 dadeer, arguidu ho lezada diskute malu kona-ba arguidu lakohi atu sira nia oan mane kontinua eskolaiha universidade tanba osan laiha atu sustenta sira nia oan nia estudu iha futuru. Bainhira diskute malu ne'e, arguidu la'o tama ba uma laran no sidi iha odamatan uma nian ne'ebé sadere helaiha parede, nune'e odamatan monu no kona iha lezada iha ulun parte kanuruk rezulta moras. Kazu ne'e aneksa hamutuk ho relatóriu médiku husi Sentru Saúde Oesilo no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 148 KP kona-ba ofensa ba integridade fízika negligente ho moldura penál to'o tinan 1 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu ho lezada.

Iha prosesu konsiliaun ne'e, lezada hakarak dame ho arguidu tanba depoisde akontesimentu sira dame kedas to'o agora. Alende ne'e, arguidu aseita ho lezada nia pedidu dame ne'e no deklara mós katak iha akontesimentu ne'e arguidu laiha intensaun

atu komete aktu ne'e hasoru lezada. Ho nune'e, lezada husu ba tribunál atu deziste tiha ninia-keixa hasoru arguidu.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezada, tribunál konklui prosesu ne'e no omologa akordu dame ba prosesu refere.

9. Krime ofensa ba integridade fízika simples ho natureza violénsia doméstika

Nú. Prosesu : 0037/19.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo Dos Santos
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1 fulan 6

Iha 17 Feveireiru 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JE hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 18 Agostu 2019, maizumenus iha oras tuku 12:00 meiodia. Bainhira arguidu toba hela, lezada fanu arguidu atu ba lalin ai-rin hodi hari'i sira nia uma. Arguidu hader no hakbesik ba lezada no basa dala ida iha lezada nia tilun-hun parte loos. Lezada halai no fai tan matan-fukun karuk iha ai-sanak rezulta lezada nia matan-fukun kanek kois, ran no moras. Kazu ne'e aneksa hamutuk ho relatóriu médiku husi Pradet no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu mós promete sei la repete hahalok hanesan hasoru lezada ka ema seluk iha futuru. Arguidu hatutan katak foin primeiravés halo krime no mai hatan iha tribunál, laiha rendimentu fiksi kada fulan, di'ak malu ona ho lezada no iha oan na'in ida.

Alende ne'e, lezada kontinua konfirma faktu sira hotu iha akuzasaun no deklara katak depoisde akontesimentu arguidu mak lori lezada ba halo tratamentu saúde no di'ak malu to'o agora. Lezada haktuir tan katak sira na'in rua hola malu iha tinan 2019 no foin primeiravés arguidu baku lezada.

Alegasaun finál

Prokuradór konsidera arguidu ninia asaun ne'e provadu tuir faktu sira ne'ebé hakerek ona iha akuzasaun. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida, atu prevene arguidu labele repete ninia hahalok ne'e hasoru lezada iha futuru.

Entretantu defeza haktuir katak aktu violénsia akontese kuandu lezada obriga fanu arguidu ne'ebé sei toba. Ho nune'e, husu ba tribunál atu aplika pena ne'ebé kmaan ba arguidu ho konsiderasaun ba iha sirkunstánsia atenuante sira hanesan arguidu konfesa, arrepende ninia hahalok, foin primeiravés komete krime no mai hatan iha tribunál, laiha rendimentu fiksi kada fulan no iha oan na'in ida.

Desizaun

Depoisde avalia faktu hotu tribunál prova katak arguidu basa dala ida iha lezada nia tilun-hun parte loos halo lezada halai no fai tan matan-fukun karuk iha ai-sanak. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nnia hahalok, foin primeiravés komete krime no mai hatan iha tribunál, laiha rendimentu fiksi kada fulan no iha oan na'in ida, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

10. Krime ofensa ba integridade fízika simples ho natureza violénsia doméstika

Nú. Prosesu : 0112/20.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 fulan 6 suspende ba tinan 2

Iha 18 Feveireiru 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CFR hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 09 Juñu 2020, maizumenus iha oras tuku 14:00 meiodia, arguidu tebe dala tolu iha lezada nia kotuk laran, basa dala rua iha lezada nia kanuruk no basa dala rua iha lezada nia hasan parte loos. Aktu sira ne'e rezulta lezada sofre moras. Antes agresaun ne'e, arguidu ho lezada diskute malu kona-ba mesagen ida ne'ebé tama iha lezada ninia telefone. Kazu ne'e aneksa hamutuk ho relatóriu médiku husi Ospital Referál Oekusi no fotografia husi polisia kona-ba rezultadu husi violénsia sira.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente ba faktu sira iha akuzasaun katak arguidu la tebe dala tolu iha lezada nia kotuk laran maibé rekoñese katak basa dala ida iha lezada nia kanuruk no basa tan dala rua iha lezada nia hasan parte loos. Arguidu mós deklarata katak hahalok hanesan ne'e la di'ak no arrepende ninia hahalok ne'e maibé to'o agora sira seidauk dia'k malu tanba arguidu ho lezada moris separadu ona. Arguidu haktuir tan katak nia serbisu hanesan to'os na'in laiha rendimentu fiksi kada fulan, foin primeiravés halo krime no mai hatan iha tribunál no arguidu iha oan ida ne'ebé sei ki'ik no hela ho lezada.

Entretantu lezada kontinua konfirma faktu sira hotu iha akuzasaun no deklarata mós katak hola malu ho arguidu iha tinan 2019 maibé depoisde akontesimentu ne'e to'o agora sira hela separadu.

Alegasaun finál

Prokuradór intende katak aktu violénsia ne'e akontese duni tuir faktu sira iha akuzasaun nune'e konsidera arguidu nia hahalok ne'e prenze duni elementu sira husi krime ofensa ba integridade fízika simples. Tanba ne'e, husu ba tribunál atu aplika pena ne'ebé hakerek ona iha artigu 145 KP atu iha futuru arguidu labele repete hikas nia hahalok ne'e hasoru ema seluk.

Entretantu defeza haktuir katak arguidu deklarata deit faktu ne'ebé nia komete, arrepende ninia hahalok ne'e, foin primeiravés halo krime no mai hatan iha tribunál. Arguidu mós serbisu hanesan to'os na'in ne'ebé laiha rendimentu fiksi kada fulan no iha oan na'in ida. Ho nune'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tebe dala tolu iha lezada nia kotuk laran, basa dala rua iha lezada nia kanuruk no basa dala rua iha lezada nia hasan parte loos. Bazeia ba faktu provadu hirak ne'e no tetu mós sirkunstánsia atenuante sira hanesan arguidu arrepende ninia hahalok, foin primeiravés halo krime no mai hatan iha tribunál, serbisu hanesan to'os na'in ne'ebé laiha rendimentu fiksi kada fulan no iha oan na'in ida, nune'e tribunál konklui prosesu ne'e no kondena arguidu ho pena prizaun tinan ida fulan neen maibé suspende ba tinan rua.

11. Krime ofensa ba integridade fízika simples ho natureza violénsia doméstika

Nú. Prosesu	: 0109/20.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Pedro Baptista Aleixo Dos Santos
Defeza	: Dr. Marcelino Marques Coro
Desizaun	: Pena multa US\$45.00

Iha 18 Feveireiru 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida JP hasoru nia la'en, iha Distritu Oekusi.

Akuzasaun Prokuradór

Prokuradór akuza katak iha 25 Agostu 2020, maizumenus iha oras tuku 19:00 kalan, arguidu ho lezada diskute malu kona-ba lezadu deskonfia arguida mak foti lezadu nia osan US\$0.50 sentavus. Ho nune'e, arguida tuku dala rua iha lezadu nia tilun parte loos no kontinua foti fiu eletrisidade nian no baku dala rua iha lezadu nia kotuk laran rezulta mean, bubu no moras. Kazu ne'e aneksa hamutuk ho relatóriu médiku husi Pradet no fotografia husi polísia kona-ba rezultadu violénsia sira ne'e.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguida konfesa faktu hotu iha akuzasaun prokuradór nian no deklara katak arrepende ninia hahalok. Arguida mós promete sei la halo tan hahalok hanesan hasoru lezadu iha futuru. Arguida hatutan katak di'ak malu ona ho lezadu, foin primeiravés komete krime hasoru lezadu no mai hatan iha tribunál, arguida hanesan funsionária iha agrikultura ho rendimentu kada fulan US\$150.00, iha oan na'in tolu no promete sei la halo tan krime hasoru nia membru família ka ema seluk iha futuru.

Alende ne'e, lezadu kontinua konfirma faktu sira iha akuzasaun no deklara katak depoisde akontesimentu ne'e liu tiha semana ida sira di'ak malu fali no to'o agora arguida la halo ona agresaun ruma hasoru lezadu. Lezadu mós haktuir tan katak arguida foin primeiravés halo krime ne'e hasoru lezadu.

Alegasaun finál

Prokuradór konsidera arguida komete duni agresaun fízika hasoru lezadu tuir faktu sira hotu iha akuzasaun, nune'e atu halo prevensaun jerál iha futuru atu arguida la komete tan krime hasoru lezadu no bele mós redus número kazu violénsia doméstika ne'ebé barak akontese iha RAE OA, husu ba tribunál atu kondena arguida ho pena prizaun fulan neen suspende nia ezekusaun ba período tinan ida.

Enkuantu defeza haktuir katak arguida konfesa intregalmente ba faktu sira iha akuzasaun, arrepende ninia hahalok, dame malu ona ho lezadu, kolabora ho tribunál, iha oan na'in tolu, promete sei la halo tan krime hasoru nia membru família ka ema seluk iha futuru, nune'e husu ba tribunál atu aplika pena ne'ebé kmaan ba arguida.

Desizaun

Depoisde avalia faktu hotu ne'ebé prodús durante julgamentu, tribunál prova katak arguida tuku dala rua iha lezadu nia tilun parte loos no kontinua foti fiu-eletrisidade nian no baku dala rua iha lezadu nia kotuk laran.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguida konfesa, arrepende ninia hahalok no promete sei la komete tan krime hanesan iha futuru. Alende ne'e, arguidu foin primeiravés mai hatan iha tribunál no di'ak malu ona ho lezadu, nune'e tribunál konklui prosesu ne'e no kondena arguida ho pena multa US\$45.00 ne'ebé kada loron arguida sei selu US\$0,50 durante loron 90. Bainhira arguida la selu pena multa ne'e, arguida sei kumpri iha prizaun durante loron 60 nu'udar pena alternativa.

12. Krime kondusaun sein karta

Nú. Prosesu : 0014/20.OESTR
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena multa US\$60.00

Iha 18 Feveireiru 2021, Tribunál Distritál Oekusi prezide julgamentu leitura sentensa ba krime kondusaun sein karta ne'ebé envolve arguidu Francisco Colo hasoru Estadu RDTL, iha Suku Costa, Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 01 Outubru 2020, maizumenus iha oras tuku 17:00 lokraik, arguidu kondús motor ho marka Revo-fit kór metan, seidak iha xapa matrikula no halai iha dalan públiku Oekusi Vila aréa Palaban. Bainhira polisía pasa revista no hetan katak arguidu laiha karta kondusaun.

Prokuradór akuza arguidu kontra artigu 207 KP kona-ba kondusaun sein karta ho moldura penál to'o tinan 2 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ninia hahalok no foin primeiravés komete krime. Liután arguidu deklara katak hahalok hanesan ne'e ladi'ak no kontra lei, arguidu sei klosan no laiha rendimentu fiksi kada fulan.

Prokuradór husu ba tribunál atu presinde depoimentu husi testemuña (Polísia Tranzitu Oekusi) tanba arguidu konfesa faktu hotu iha akuzasaun. Bazeia ba pedidu ne'e, tribunál presinde depoimentu husi testemuña refere.

Alegasaun finál

Prokuradór konsidera arguidu provadu komete krime kondusaun sein karta bazeia ba konfisaun arguidu nian. Prokuradór haktuir tan katak krime kondusaun sein karta kada fulan sempre akontese, tanba ne'e husu ba tribunál atu kondena arguidu tuir pena ne'ebé hakerek ona iha artigu 207 KP.

Enkuantu defeza haktuir katak arguidu konfesa, arrepende ninia hahalok, foin primeiravés mai hatan iha tribunál, sei klosan no laiha rendimentu fiksi kada fulan. Tanba ne'e, husu ba tribunál atu aplika ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu kondús motor ho marka Revo-fit kór metan, laiha xapa matrikula, laiha karta kondusaun no halai iha dalan públiku.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no foin primeiravés komete krime, nune'e tribunál konklui prosesu ne'e no kondena arguidu ho pena multa US\$60.00. Pena ne'e arguidu sei selu US\$0,50 kada loran durante loran 120. Bainhira arguidu la selu pena multa ne'e, arguidu sei kumpri iha prizaun durante loran 80 nu'udar pena alternativa.

13. Krime ofensa ba integridade fízika simples ho natureza violénsia doméstika

Nú. Prosesu : 0025/19.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena admoestasaun

Iha 19 Fevereiru 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PQC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 07 Jullu 2019, maizumenus iha oras tuku 15:00 lokraik, arguidu basa dala ida iha lezada nia hasan parte karuk rezulta moras no bubu. Antes agresaun ne'e, arguidu ho lezada diskute malu kona-ba sira nia fahi ne'ebé halai sai husi luhan laran. Ho nune'e arguidu komete agresaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene katak kuandu ofende ema seluk nia isin bele rezulta moras. Arguidu mós deklara katak arrepende ninia hahalok, dia'k malu ona ho lezada to'o agora no promete ba tribunál sei la repete ninia hahalok ne'e hasoru lezada ka ema seluk iha futuru. Arguidu haktuir katak foin primeiravés halo krime no mai hatan iha tribunál, iha oan na'in haat no serbisu hanesan profesor kontratadu ho vensimentu kada fulan US\$166.00.

Entretantu lezada kontinua konfirma faktu sira hotu iha akuzasaun no deklara katak arguidu foin primeiravés halo agresaun fízika hasoru lezada no sira na'in rua hola malu iha tinan 2009.

Alegasaun finál

Prokuradór intende katak arguidu hanesan profesor ida ne'ebé iha ona koñesimentu kona-ba hahalok sira ne'ebé tuir lei konstitui hanesan krime, maibé arguidu nafatin halo agresaun fízika hasoru lezada nu'udar nia feen rasik. Tanba ne'e, husu ba tribunál atu aplika pena prizaun tinan ida suspende ba tinan ida ho objetivu atu arguidu la repete nia hahalok ne'e hasoru lezada no ema seluk iha futuru inklui mós atu hamenus kazu sira ho natureza violénsia doméstika ne'ebé aas iha Oekusi.

Entretantu defeza husu ba tribunál atu aplika pena multa ba arguidu tuir nia sala ho hanoin ida katak kuandu tribunál aplika pena prizaun bele prejudika arguidu nia avaliasaun dezempeñu serbisu ne'ebé oras ne'e sei kontratadu hela. Defeza mós akresenta liútan katak arguidu iha kolaborasaun di'ak ho tribunál, konfesa faktu hotu iha akuzasaun, arguidu mós arrepende ninia hahalok, promete sei la komete tan krime hasoru nia membru família ka ema seluk, dame malu ona no iha oan na'in haat.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte karuk. Bazeia ba faktu provadu ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no promete sei la komete tan krime hanesan hasoru lezada ka ema seluk iha futuru, ho nune'e tribunál konklui prosesu ne'e no kondena arguidu ho pena admoestasaun.

14. Krime ofensa ba integridade fízika simples ho natureza violénsia doméstika

Nú. Prosesu	: 0190/19.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Mateus Nesi
Defeza	: Dr. Marcelino Marques Coro
Desizaun	: Pena multa US\$120.00

Iha 19 Fevereiru 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MC hasoru lezadu DVN nu'udar arguidu nia rian, iha Distritu Oekusi.

Akuzasaun Prokuradór

Prokuradór akuza katak iha 16 Dezembru 2019, maizumenus iha oras tuku 19:00 kalan. Bainhira arguidu fila husi serbisu fatin, lezadu seidauk fase bikan no tein. Ho nune'e, arguidu haruka lezadu atu fase bikan foer no tein, maibé lezadu nafatin tuur iha dapur kotuk tanba la rona saida mak arguidu ko'alia. Tanba lezadu kontinua tuur, nune'e arguidu sai husi uma laran ba iha dapur kotuk no basa dala ida iha lezadu nia hasan parte karuk, hafoin lezadu la'o tama ba uma laran arguidu tuir lezadu husi kotuk no tebe dala ida iha lezadu nia kanotak, tebe dala ida iha hirus-matan no tuku dala ida iha

kabaas. Aktu sira ne'e rezulta lezadu sofre moras iha fatin atenjidu sira. Kazu ne'e aneksa hamutuk ho relatóriu médiru husi Ospital Referal Oekusi no fotografia husi polisia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(c), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no rekoñese katak hahalok hanesan ne'e ladi'ak. Arguidu mós deklara katak arrepende ninia hahalok, depoisde liu tiha semana ida arguidu no lezadu dame malu fali no to'o agora hela hamutuk nafatin. Arguidu haktuir katak foin primeiravés halo krime hasoru lezadu no mai hatan iha tribunál no to'o agora arguidu la repete ninia hahalok. Arguidu hatutan katak lezadu hela ho arguidu tinan tolu ona, arguidu iha oan na'in rua no hanesan enfermeiru arguidu nia vensimentu kada fulan US\$457.00.

Alende ne'e, lezadu mós kontinua konfirma faktu sira hotu iha akuzasaun no deklara katak depoisde akontesimentu to'o agora arguidu la komete ona krime hasoru lezadu no arguidu mak tau matan ba lezadu. Lezadu mós konfirma arguidu nia deklarasaun katak depoisde akontesimentu ne'e liu tiha semana ida sira di'ak malu fali.

Alegasaun finál

Prokuradór konsidera arguidu provadu komete krime hasoru lezadu tuir faktu sira iha akuzasaun no tetu mós katak tuir loloos arguidu tenke tau nia-an hanesan funsionáriu públiku ida no respeito nia rian, tanba arguidu mak iha koñesimentu di'ak kona-ba aktu violénsia. Prokuradór hatutan katak krime violénsia doméstika aas liu iha Rejiaun Oekusi kompara ho munisípiu sira seluk, nune'e atu halo prevensaun jerál no eduka arguidu labele repete hikas ninia hahalok ne'e hasoru lezadu ka ema seluk, husu ba tribunál atu aplika pena ne'ebé hakerek ona iha artigu 145 KP.

Enkuantu defeza haktuir katak iha produsaun ba prova arguidu rasik koopera di'ak ho tribunál hodi hato'o lia loos ba tribunál tuir de'it faktu sira ne'ebé hakerek ona iha akuzasaun. Arguidu mós konsidera ninia hahalok ne'e la loos hasoru nia rian, nune'e liu tiha semana ida arguidu dame malu fali ho lezadu no kontinua hela hamutuk. Ho hune'e, husu ba tribunál atu aplika pena ne'ebé kmaan ba arguidu ho konsiderasaun ba iha sirkunstánsia atenuante sira hanesan arguidu konfesa, arrepende ninia hahalok, foin primeiravés komete krime no mai hatan iha tribunál.

Desizaun

Depoisde avalia faktu sira hotu ne'ebé prodús durante julgamentu, tribunál prova katak arguidu basa dala ida iha lezadu nia hasan parte karuk, tebe dala ida iha lezadu nia kanotak, tebe dala ida iha hirus-matan no tuku tan dala ida iha kabaas.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés komete krime no mai hatan iha tribunál no mós di'ak malu ona ho lezadu, nune'e tribunál konklui prosesu

ne'e no kondena arguidu ho pena multa US\$120.00 ne'ebé kada lora arguidu sei selu US\$1.00 durante lora 120. Bainhira arguidu la selu pena multa ne'e, arguidu sei kumpri iha prizaun durante lora 80 nu'udar pena alternativa.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl